

ՄԻՆԱՍ ԲԱԼԱԲԱՆՅԱՆԻ ՇՐՋԱՆԻՆ ՎԵՐԱԲԵՐՈՂ ԵՐԳԵՐ

Նոր Նախիջևանի պատմության մեջ մեծ տեղ է բռնում Մինաս Բալաբանյանը, որը 1888 թվականից մինչև 1913 թվականի վերջը փոքր ընդհատումներով վարեց քաղաքագլխի պաշտոնը։ Նրա օրոք սալահատակվեց ամբողջ քաղաքը, շինվեցին քաղաքային ջրմուղը, էլեկտրակայանը, շուկան, աղջիկների և տղաների գիմնազիաները, Կոկոյան գիմնազիան, Հոփսիսիմյան ուսումնարանը, նա տնկել տվեց քաղաքի հյուսիսային կողմում 75 դեսյատին անտառակը, նրա օրով եկավ տրամվայը, շինվեց քաղաքային թատրոնը և շատ ուրիշ արժեքավոր շենքեր։ Բալաբանյանը մեծ զարկ տվեց քաղաքի տնտեսության զարգացմանը։ Նրա օրով շինվեց քաղաքային սպանդանոցը։ Բալաբանյանի ջանքերով հիմնվեց հայոց աղքատախնամ ընկերության Ռոստովի հասուցարար մեծ տունը, որի եկամտով պահվում էր որբանոց, անկեղանոց և այլն։

Նրա օրով քաղաքը կառուցեց Եկատերինե երկրորդի հուշարձանը, որը կանգնած էր մայր եկեղեցու առաջ մեջքով դեպի եկեղեցին։ Այդ առիթով շատ հայեր անբավական էին և մեղադրում էին Բալաբանյանին։ Բալաբանյանին է վերաբերում անցյալ դարի իննսունական թվականներին հորինված «Ա՛յ քաղաք, պայծառ քաղաք» երգը։

ԳՈՎԵԼԻ ՔԱՂԱՔ

Ա՛յ քաղաք, գովելի քաղաք,
Բայձառ քաղաք, գովելի քաղաք,
Քաղաքին քենարը, սելվի ձառեր,
Սելվի ձառեր, վաշդի ձառեր։

Քաղաք մզանք՝ բաձրո գուններ,
Թուլայն գուններ, դեսոք գուններ,
Ա՛յ քաղաք, գովելի քաղաք,
Բայձառ քաղաք, գովելի քաղաք։

Նեսեն-դուսեն քիոփիչե բադեր,
Բոյա քըսած բաձրո գուններ,
Ա՛յ քաղաք, գովելի քաղաք,
Բայձառ քաղաք, գովելի քաղաք։

Սոխախները քարվածք արած,
Քեսմե քարը սըրայով շարած,
Ա՛յ քաղաք, գովելի քաղաք,
Բայձառ քաղաք, գովելի քաղաք։

Ժեք ծի լըձաձ կոնկան կովար,
Մեր մալիեն շադ եդ գըմնար,
Ա՛յ քաղաք, գովելի քաղաք,
Բայձառ քաղաք, գովելի քաղաք։

Սուր Գևորգին մաղաղ արինք,
Եդեկ ողբը դերբային դվինք,
Ա՛յ քաղաք, գովելի քաղաք,
Բայձառ քաղաք, գովելի քաղաք։

Ցալին իջանք, շադ զավոդ գար,
Վառաձներն ալ սալթը փաղ էր,
Ա՛յ քաղաք, գովելի քաղաք,
Բայձառ քաղաք, գովելի քաղաք։

Բազար էլանք, ժուլիք շադ գար,
Եդ էգանք, դագերուս գիզը չկար,
Ա՛յ քաղաք, գովելի քաղաք,
Բայձառ քաղաք, գովելի քաղաք։

Լուսավորչի սոխախը էլլանք,
Քաթեռնային սուրեթը գեսանք,
Էրեսը դերի Ռոստով արած,
Լուսավորչին էդև արած։
Շադ աղեդ է, շադ դեսոք է,
Ամա մեգ պան շադ ամոթ է,
Ինչի ժամին էդև արիլ է,
Ինչի մեղմեն խոռվիլ է,
Մինաս աղա, Մինաս աղա¹,

¹ Մինաս աղան ժամանակավ քաղաքագլուխ Մինաս Բալաբանյանն է։

Դուն շուր արա մեզի ասա,
Դասին աղպես դուն արիլ իս,
Դասին ասպես դուն դրիլ իս,
Ա՛յ քաղաք, գովելի քաղաք,
Բայձառ քաղաք, գովելի քաղաք:

Սուր Դևորգի քովուրեն անցանք,
Անգից անքով բան չիմացանք,

Շիդագն ասաձ ես հոգնեցա,
Ես հոգնեցա, պան չիմացա:
Ա՛յ քաղաք, գովելի քաղաք,
Բայձառ քաղաք, գովելի քաղաք²:

² Այս երգի նոտագրված տարբերակը տե՛ս սույն
գրքում, Մ. Լյուկեճյանի ժողովածուն: